

## Edizione diplomatico-interpretativa

	I
Pvs flum iordan ai uist el monimen. auos uers. dieus ques senher dels se nhors. ne ren merces q(a)r uos plac tan donors. quel sancte loc on nasques ueramen. mauetz mostrat don ai mon cor iauzen. quar sieu era em proensa dun an. nom clamarian sarrazis iohan.	Pus flum Iordan ai vist e-l monimen a vos vers Dieus, qu'es Senher dels senhors, ne ren merces, qar vos plac tan d'onors que-l sancte loc on nasques veramen m'avetz mostrat, don ai mon cor iauzen, quar s'ieu era em Proensa, d'un an no-m clamarian sarrazis Iohan.
	II
Arans don dieus bona uie bon uen. e bona nau e bos gouerna dors. qua mar celha men uuelh tornar decors. quar sieu era d(e) lay mar ueramen. acre e sur e tripol el siruen. el espital el templel rey iohan. coman a dieu e laigua de rotlan.	Ara·ns don Dieus bona vi' e bon ven e bona nau e bos governadors qu'a Marcelha m'en vuelh tornar de cors, quar s'ieu era de lay mar veramen, Acre e Sur e Tripol e-l Sirven e-l Espital e-l Templ' e-l rey Iohan coman a Dieu e l'aigua de Rotlan.
	III
Q uen la terra a croy emendamen. del rey richart de fransa ab sas flors. solia uer bon rey e bos senhors. e nespanha un autre rey ualen. e mon ferrat bo marques eyssamen. el emperi emperador prezan. aquestz q(ue)y-son no sai quos captenran.	Qu'en la terra a croy emendamen del rey Richart de Fransa ab sas flors, soli' aver bon rey e bos senhors, en Espanha un autre rey valen, e Monferrat bo marques eyssamen, e l'emperi emperador prezan, aquestz que·y son no sai quo·s captenran.
	IV
Belh senher dieus si feyssetz a mon sen. ben guardaratz q(ui) faitz emperadors. ni qui faitz reys ni datz castels ni tors. quar p(us) son rics uos teno anien. q(ui)eu ui antan faire man sagramen. lemperador don ar sen uai camjan. quo fes lo guasc que traisses de la fan.	Belh Senher Dieus, si feyssetz a mon sen, ben guardaratz qui faitz emperadors ni qui faitz reys ni datz castels ni tors, quar pus son rics, vos teno a nien, qu'ieu vi antan faire man sagramen l'emperador don ar s'en vai camjan quo fes lo guasc que traisses de l'afan.
	V

E mperador damiataus aten. e  
nueg e iorn plora la blanca tors.  
per uostraigla quen gitet us uou-  
tors. uolpilla es aigla q(ue) uoutr  
pren. antay auetz el soudan on  
ramen. e part lanta auetz hi  
tug tal dan. que nostra ley sen  
uai tro rezeguan.

Emperador, Damiata-us aten,  
e nueg e iorn plora la blanca tors  
per vostr' aigla que·n gitet us vouters:  
volpilla es aigla que voutor pren,  
anta·y avetz e·l soudan onramen,  
e, part l'anta, avetz hi tug tal dan  
que nostra ley s'en vai tro rezeguan.

- letto 352 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

**Source URL:** <https://letteraturaeuropea.let.uniroma1.it/?q=laboratorio/edizione-diplomatico-interpretativa-828>